

Siunnersuummut nassuiaatit

Nassuiaatit nalinginnaasut

1. Aallaqqaasiut

Erngup nukingata innaallagissiornermut atorneqartarnera pillugu Inatsisartut inatsisaata akuerineqarnerata aammalu kommunit aquneqarnerat pillugu Inatsisartut inatsisaata akuerineqarnerata sunniutigisaannik, aatsitassat pillugit ingerlatallu tamatumunnga pingaarutillit pillugit inatsisartut inatsisaanni (aatsitassanut ikummatissanullu inatsit) matuma kinguliani allassimasut allangortinneqarput.

2. Siunnersuummi immikkoortut pingaarnerit

Maannamut aatsitassarsiorluni suliassamut atatillugu erngup nukinganik atuinissamut akuersissummik pissarsinissamut, pisinnaatitsissummik pigisaqartup aatsitassanik peqarfeqarneranik takussutissaqartitsinera niuernermillu tunngaveqartumik piarneqarsinnaasumik killissalersuisimanissaa, apeqqutaasimavoq. Piumasaqaat taanna naammassiniarlugu pisinnaatitsissummik pigisaqartup imminut akilersinnaassutsimik misissuilluni, suliassamut aningaaserivimmit aningaasalersuinissaq anguneqarsinnaasoq, uppersarsinnaasussaavaa. Erngup nukinganik nukissiorfiliornissaq annertoorujussuarnik sanaartornermut aningaasartuuteqarfiusussaasarmat, aammalu erngup nukinganik nukissiorfik nalinginnaasumik aatsitassarsiorluni suliassamut sivilisunerusumik atasussaasarmat, suliaqarnermi paasinarsisimavoq taamatut maleruagassiinikkut ataqatigiissitsineq ajornakusoortoq naleqqutinningsorlu.

Taamaattumik erngup nukingata innaallagissiornermut atorneqartarnera pillugu Inatsisartut inatsisaata nutaap akuerineqarneranut atatillugu, erngup nukinga pillugu aalajangersakkat tamarmik Inatsisartut inatsisaanni tassani ataatsimoortinneqarnissaat, naleqqussorineqarpoq. Erngup nukinganik aatsitassarsiorfimmuut innaallagamik pilersuinissamut atuinerup erngup nukinganut ingerlatseqatigiiffiup aamma aatsitassarsiorfutileqatigiiffiup akornanni isumaqatigiissut naapertorlugu pisinnaanissaa, tamatuma ajornarunnaarsissavaa.

Ingerlatanut aatsitassanut ikummatissanullu inatsimmi pineqartunut ilaasunut atatillugu atugassatut, erngup nukingata innaallagissiornermut atorneqartarnerata maleruagassiivigineqarneranut tunngatillugu nalornilertoqarnissaa pinngitsoortinniarlugu, erngup nukinga pillugu aalajangersakkat atuuttut aatsitassanut ikummatissanullu inatsimmit peerneqarput.

Kommunalbestyrelsit aamma nunaqarfimmi siulersuisut il.il. pillugit inatsisartut inatsisaata, kommunit aquneqarnerat pillugu Inatsisartut inatsisaannit taarserneqarsimanera pissutigalugu, kommunit aquneqarnerat pillugu Inatsisartut inatsisaat pillugu allangortitsinermut tunngatillugu, sunniutaasumik allangortitsisoqarpoq.

Siunnersuut Inatsisartut inatsisaannut atuuttumut sanilliullugu	
<i>Oqaasertalerneqarnera atuuttoq</i>	<i>Siunnersuut</i>
	<p>§ 1</p> <p>Aatsitassat pillugit ingerlatallu tamatumunnga pingaarutillit pillugit Inatsisartut inatsisaanni nr. 7, 7. december 2009-imeersumi (aatsitassanut ikummatissanullu inatsit), Inatsisartut inatsisaanni nr. 26, 18. december 2012-imeersumi, Inatsisartut inatsisaanni nr. 6, 8. juni 2014-imeersumi, Inatsisartut inatsisaanni nr. 16, 3. juni 2015-imeersumi aamma Inatsisartut inatsisaanni nr. 34, 28. november 2016-imeersumi allanngortinneqartumi, makkua allanngortinneqarput:</p>
<p>§ 2. Kalaallit Nunaanni aatsitassanik atuinissamut aamma nunap iluani pisuussutinik atuinissamut Kalaallit Nunaanni Namminersorlutik Oqartussat piginnittussaataapput.</p> <p><i>Imm. 2.</i> Ingerlatat tulliuttuni taagorneqartut inatsisartut inatsisaanni malittarisassat malillugit Naalakkersuisut akuersissuteqareerneranni taamaallaat ingerlanneqarsinnaapput, takuulli §§ 45-48:</p> <ol style="list-style-type: none"> 1) Kalaallit Nunaanni aatsitassat pillugit misissueqqaarnerit, misissuinerit pïaanerillu kiisalu aatsitassanik Kalaallit Nunaannit aallarussinerit. 2) Nunap iluata toqqorsivittut atorneqarnera imaluunniit aatsitassanik sammisaqarnermi siunertanut atorneqarnera. 3) Ingerlatanut inatsisartut inatsisaannut ilaasunut imermit, anorimit, nunap iluanit nukissiornermik atorluaaneq. 4) Inatsisartut inatsisaannut ilaasunik sammisaqarnermi ruujorikkut aqputinik sanaartorneq ingerlatsinerlu. <p><i>Imm. 3.</i> Taamaattorli Namminersorlutik Oqartussat aatsitassanut tunngasuni ilisimatuussutsikkut suliassatigullu ataatsimut isigalugu nunallu assingatigut nalunaarsuinnermut attuumassuteqartunik, kiisalu pissutsini aatsitassanik ingerlataqarnermut pingaarutilinni, aatsitassarsiornermik ingerlatsineri, nunap</p>	<p><i>I. § 2-mi, imm. 2, nr. 3, § 10-mi, nr. 2, § 20-mi, imm. 1, 1. pkt. aamma § 73-mi, imm. 1, nr. 4 "imeq" peerneqarpoq.</i></p>

iluanit toqqorsimatitsinernut atuinermit imaluunniit aatsitassanut ingerlataqarnernut atatillugu siunertanut atuineq, sulianut atatillugu nukissiornermik ingerlataqarnernut, ingerlatsinermut attuumasunut ruujorikkut aqqutinik ingerlatsineq imaluunniit ingerlatanut allanut tunngassuteqartuni suliarinnissinnaapput.

Imm. 4. Taamaakkaluartoq De Nationale Geologiske Undersøgelser for Danmark og Grønland (GEUS) aamma Nationalt Center for Miljø og Energi (DCE) Kalaallit Nunaanni aatsitassanik misissuinermit tunngassuteqartunik immikkut ittumik ilisimatusarsinnaapput, Kalallit Nunaanni Nammissorneq pillugu inatsimmi § 9, imm. 4 malillugu ilisimatusarnerit taamaattut Naalakkersuisunut atortinneqarnissaannut danskit naalakkersuisuisa taamaaliornissamik pisussaaffii naapertorlugit ingerlanneqarpata.

§ 10. Inatsisartut inatsisaat makkunani atuuffeqarpoq:

- 1) Aatsitassanik misissueqqaarnerit, misissuinerit piiaanerillu, kiisalu ingerlatat taakkununnga attuumassuteqartut allat.
- 2) Inatsisartut inatsisaanni matumani ilaatinneqartuni imermit, anorimit nunallu iluanit atorluanikkut nukissiornissaq siunertaralugu misissueqqaarneq atorluanerlu kiisalu taama ingerlataqarnernut attuumassuteqartut.
- 3) Nunap iluanik toqqorsivittut atuineq, kiisalu aatsitassarsiornermi ingerlatsinernut atatillugu siunertat attuumassuteqartunik allatut atuinerit.
- 4) Ingerlatanut nr. 1-3-mi taaneqartunut pingaaruteqartunik ilisimatuussutsikkut, tigussaasukkut allatigullu misissuinerit.

§ 20. Piiaanissamut pilersaarutip akuerineqarneranut atatillugu Naalakkersuisut § 19 malillugu akuersisinnaapput nukissiorfimmik pilersitsisoqarsinnaasoq, aatsitassarsiorfik imaluunniit imartani sanaartukkat/atortut anorimit aamma imermit nukissiornermik

imaluunniit nukissiuutinik allanik pilersorneqarsinnaateqqullugit. Ingerlatanut atatillugu nukissiorfissamut akuersissut pīaanermi akuersissummut ilaatillugu tunniunneqassaaq. Nukissiorfik § 19 malillugu akuerineqassaaq.

Nukissiorfissamut akuersissummut atatillugu taamattaq isummerfigineqassaaq innaallagissamut aqqutit kabel-it assigisaallu sumut inissineqassanersut.

Imm. 2. Nukissiornissamut imm. 1 malillugu akuersinermut atatillugu nukissiornermi sanaartukkap taassumalu atornissaa il.il. Naalakkersuisut piumasaqaatinik aalajangersaassapput, ilaalluni akeqanngitsumik namminersorlutik oqartussanut tunniussinissaq, piginnaatitsissutinik pigisaqartut arlallit nukissiorfimmik taassuminnga atuisinnaanissaannut aaqqeeqatiginnerit, kiisalu nukissiornermik allanik pilersuinissamut pisussaaffeqarneq.

Imm. 3. Imm. 1 malillugu nukissiorfiliornissamut akuersissummi Naalakkersuisut piumasaqaatinik aalajangersaasinnaapput, piginnaatitsissummik pigisaqartoq Namminersorlutik Oqartussanut akiliutinik akiliisassasoq. Tamatumani piumasaqaatit aalajangersarneqarsinnaapput, ukiumoortumik akiliummik akiliisoqartassasoq, sumiiffiup akuersissuteqarfiusup annertussusia tunngavigalugu naatsorsorneqartumik (nunaminertamut akiliut) imaluunniit nukissiornermi pisuussutit pīarneqartut tunngavigalugit (annertussutsimut akiliut) imaluunniit nukissiorneq tunisassiarineqartoq (tunisassiornermut akiliut). Taamattaq ingerlatat akuersissummut ilaasut aningaasarsiornikkut iluanaarutit ilaannik Namminersorlutik Oqartussanut akiliuteqartarnissaq piumasaqaatit aalajangersarneqarsinnaalluni (iluanaarutinit akiliut).

§ 73. Ingerlatanut tulliuttunut arlaannut akuersissut aamma akuerinninneq taamaallaat tunniunneqarsinnaavoq,

ingerlatamik isumaginninnermi avatangiisinut sunniuteqarnissaasa nalilersorneqarnerat tungavigalugu, tamannalu pillugu avatangiisinik nalilersuilluni nassuiaammik aatsaat suliarinnittoqareerpat akuersissut tunniunneqarsinnaavoq:

- 1) Ikummatissanik pīaaaneq.
- 2) Aatsitassanik pīaaaneq, kapitali 8 malillugu aatsitassanik annikitsumik pīaaaneq aamma kapitali 11 malillugu akuersissuteqarnani aatsitassanik katersineq pīaaanerlu ilanngunnagit.
- 3) Nunap iluanik toqqorsivittut atuineq imaluunniit aatsitassanik ingerlatsinermit atatillugu siunertat.
- 4) Inatsisartut inatsisaat manna malillugu sammisanut ilaasunut imermit, anorimit imaluunniit nunap iluanit atorluaalluni nukissiorneq.
- 5) Sanaatukkanik/atortunik annertuunik inatsisartut inatsisaannut ilaasunik atorneqartunik pilersitsineq imaluunniit inissiineq atuinerlu, tamakkununnga ilaallutik avataani pīaaaffiit, avataani pīaaaffiit nuunneqarsinnaasut, umiarsuit najugaqarfiusut, qaarusuit aatsitassarsiorfiit, nunap iluani atortut, sulianut atatillugu nukissiorfiit aamma ruujorikkut aqqusersuineq.
- 6) Ingerlatamik unitsitsineq imaluunniit sanaartukkanik/atortunik assigisaannillu nr. 1-5-imi taaneqartunik ingerlatsineq imaluunniit sanaartukkanik/atortunik nr. 5-imi taaneqartunik isaterineq imaluunniit matusineq.

Imm. 2. Ingerlataq, inatsisartut inatsisaannut matumunnga ilaasoq, imm. 1- imut ilaangitsoq, avatangiisinut annertuumik sunniuteqarsinnaasutut isumaqarfigineqarsinnaasoq, ingerlatassamut taamaallaat akuersissuteqartoqarsinnaavoq, avatangiisinut sunniutissat nalilersorneqareerpata kiisalu avatangiisinut sunniutissanut nalilersuineq Naalakkersuisunit akuerineqareerpat.

Imm. 3. Naalakkersuisut aalajangissavaat imm. 2-mi taaneqartutut pisuni avatangiisinut sunniutissat pillugit naliliinermik aamma

<p>avatangiisinut sunniutissat pillugit nassuiaammik suliarinnittoqassanersoq. Aalajangii nissamut atugassanik piunasaqaatinik aalajangers imanerusunik Naalakkersuisut aalajangersaassapput.</p>	
<p>§ 96, <i>imm. 4.</i> Unioqqutsineq suliffeqarfimmit, tamakkiisumik ilaannakortumilluunniit Kalaallit Nunaanni Namminersorlutik Oqartussanit, kommunimit imaluunniit kommunit ataatsimoorullugu pigineqartumit, kommunalbestyrelsit aamma nunaqarfimmi siulersuisut il.il. pillugit inatsisartut inatsisaannut ilaasunit, aktieselskabimi, anpartsselskabimi, andelselskabimi assigisaanniluunniit unioqqutsineq pisimappat, suliffeqarfik assigisaallu akisussaatinneqassapput, pinerluttulerinermit inatsit taamaattoq malillugu akisussaaffilerlugit. Taamattaq atuuppoq, Namminersorlutik Oqartussani, kommuni imaluunniit kommunit ataatsimoorussaanni, kommunalbestyrelsit aamma nunaqarfimmi aqutsisut il.il. inatsisartut inatsisaanni ilaasuni unioqqutsineq pisimappat.</p>	<p>2. § 96, imm. 4-imi, allangortinneqarpoq "kommunalbestyrelsit aamma nunaqarfimmi siulersuisut il.il. pillugit inatsisartut inatsisaat" imaalergu "kommunit aqunneqarnerat pillugu Inatsisartut inatsisaat".</p>
	<p style="text-align: center;">§ 2</p> <p>Inatsisartut inatsisaat manna ulloq 1. januar 2019 atuutilerpoq.</p>

3. Pisortanut aningaasaqarnikkut allaffissornikkullu sunniutaasussat

Siunnersuut pisortanut aningaasaqarnikkut allaffissornikkullu sunniuteqassanngitsaq naatsorsuutigineqarpoq.

4. Inuussutissarsiorturnut aningaasaqarnikkut allaffissornikkullu sunniutaasussat

Siunnersuut inuussutissarsiorturnut aningaasaqarnikkut allaffissornikkullu sunniuteqassanngitsaq naatsorsuutigineqarpoq.

5. Avatangiisinut, pinngortitamut aamma inuit peqqissusaannut sunniutaasussat

Siunnersuut avatangiisit, pinngortitaq imaluunniit inuit peqqissusaannut tunngasut pillugit najoqqutassatigut maleruagassanik imaqaanngilaq. Taamaattumik siunnersuut avatangiisinut, pinngortitamut imaluunniit inuit peqqissusaannut sunniuteqassanngilaq.

6. Innuttaasunut sunniutaasussat

Siunnersuut innuttaasunut aningaasaqarnikkut sunniuteqassanngitsaq naatsorsuutigineqarpoq.

7. Sunniutaasussat allat annertuut

Siunnersuut allanik annertuunik sunniuteqassanngitsoq naatsorsuutigineqarpoq.

8. Oqartussanut kattuffinnut ilaalu ilanngullugit tusarniaaneq

Siunnersuut piffissami 11. juni 2018 – 7. juli 2018 tusarniaanermut nittartakkami tamanut saqumitineqarpoq. Piffissami tassani siunnersuut tusarniaaffigineqartunut makkununnga nassiuunneqarpoq:

Aningaasaqarnermut Naalakkersuisoqarfik

Pinngortitamut Avatangiisinullu Naalakkersuisoqarfik

Inuussutissarsiornermut Nukissiuuteqarnermullu Naalakkersuisoqarfik

Makkununnga tusarniaanermut akissuteqaat tiguneqarpoq:

Aningaasaqarnermut Naalakkersuisoqarfik, Inuussutissarsiornermut Nukissiuuteqarnermullu Naalakkersuisoqarfik, Aatsitassanik Suliassaqaarfinnut Avatangiisinut Aqutsisoqarfik aamma Kommune Kujalleq.

Tulliuttuni tusarniaanermut akissuteqaatit, avataanut tusarniaanerup nalaani tiguneqartut, sammineqarput. Oqaatigineqassaaq tusarniaanermut akissuteqaatit orlingasumik allassimasut, taamaallaat pingaaruteqarnerannik nalilersuineq tunngavigalugu pingaarnertiguinnaq issuarneqarmata.

Aningaasaqarnermut Naalakkersuisoqarfik pingaarutilinnik oqaaseqaatissaqaanngilaq.

Inatsisissatut siunnersuutip matuma aammalu erngup nukinganit isumalluutininik atuinissaq pillugu inatsisissatut siunnersuutip imminnut ataqtiginnerat ersarissaqqinneqassasoq, Inuussutissarsiornermut Nukissiuuteqarnermullu Naalakkersuisoqarfiup siunnersuutigaa.

Siunnersuut malinneqarpoq, aammalu allannguutit erngup nukinganut tunngassuteqartut, erngup nukinganit isumalluutininik atuinissaq pillugu siunnersuummut ataqtigilluinnartut, ersarissaqqinneqarlutik.

Aatsitassanik Suliassaqaarfinnut Avatangiisinut Aqutsisoqarfiup tikkuarpaa avatangiisinut suliassaqaarfimmi allaffissorinnikkut aqutsineq pillugu inatsimmi tunngavissat arlallit, ilanngullugu allaffissornermut aningaasartuutininik utertitsilluni akiliisarneq, inatsisip allanngortinneqarnerata malitsigisaanik allanngortinneqartussaasut.

Erngup nukinga pillugu pissutsit aalajangersimasut aatsitassat pillugit ingerlatallu tamatumunnga pingaarutillit pillugit inatsimmi (aatsitassanut ikummatissanullu inatsit) maleruagassiivigineqarunnaarsimappata, pissutsit taakkua erngup nukinganit isumalluutininik atuinissaq pillugu Inatsisartut inatsisaanni nutaami maleruagassiivigineqassapput.

Kommune Kujalliup oqaatigaa, erngup nukinganut inatsisissamut nutaamut siunnersuut, siunnersuummut kommunini tusarniaassutigineqareersumut sanilliullugu allannguutininik imaqaarsimappat, kommunini tusarniaassutigineqartariaqaraluartoq.

Siunnersuummi aalajangersakkanut ataasiakkaanut nassuiaatit

§ 1-imut

Nr. 1-imut (*§ 2, imm. 2, nr. 3, § 10, nr. 2, § 20, imm. 1, 1. pkt. aamma § 73, imm. 1, nr. 4*)

Erngup nukingata innaallagissiornermut atorneqartarnera pillugu Inatsisartut inatsisaata akuerineqarneranut atatillugu erngup nukinganut tunngasut aalajangersakkat tamarmik, Inatsisartut inatsisaanni tassani ataatsimoortinnissaat, naleqqussorineqarpoq.

Oqaatsip ”imeq” aatsitassanut ikummatissanullu inatsimmi aalajangersakkanit, aatsitassarsiornermik suliassanut atatillugu nukissamik ataavartumik atuinissamut tunngassuteqartunit, peerneqarneratigut tamanna pissaaq.

Nr. 2-imut (*§ 96, imm. 4*)

Matuma ”kommunalbestyrelsit aamma nunaqarfimmi siulersuisut il.il. pillugit inatsisartut inatsisaat” imatut ”kommunit aqunneqarnerat pillugu Inatsisartut inatsisaat” allangortinneqarneranut tunngatillugu, tamanna kommunalbestyrelsit aamma nunaqarfimmi siulersuisut il.il. pillugit inatsisartut inatsisaata atorunnaarsinneqarnerata aammalu kommunit aqunneqarnerat pillugu Inatsisartut inatsisaannit taarserneqarnerata, sunniutigaa.

§ 2-imut

Imm. 1-imut

Aalajangersagaq siunnersuutip piffissaq atuutilerfissaanut tunngassuteqarpoq.

Siunnersuutigineqarpoq siunnersuut ulloq 1. januar 2019 atuutilissasoq.